

## Inatsisissatut siunnersuummut oqaaseqaatit

### **Nalinginnaasumik oqaaseqaatit**

#### *1. 1. Siunnersuummut tunuliaqutaasut*

Folketinge-p L 223, 22. marts 2011-meersoq Aningaasanoorutit ilaat pillugit Kalaallit Nunaannut Inatsit akuersissutigivaa. Inatsisip, Kalaallit Nunaanni Aningaasanoorutinit Namminersorlutik Oqartussanit tiguneqarsimanngitsunit, malittarisassat nutaat tamakkiisut atuutilersippaa. Tassani ilaatigut pineqarput eqquniaasitsinerit, eqqoriaasitsinerit internetsikkullu aningaasanoorfiit. Inatsit danskit inatsisaannut assingusorjuuvoq, kingunerlugulu aningaasanoorutinit ingerlataqarnerup ilaata eqquniaasitsinerit internetsikkullu aningaasanoorfiit namminersortunngorsaavigineqarnera. Inatsisissatut siunnersuut § 35-imik inatsimmik qulaani taaneqartumik atortuulersitsineruvoq.

Danskit inatsisaata kinguneraa tipsernermit lottornermillu iluanaarutinit pissarsiat agguanneqartarneri maanna allanngortinneqassammat aningaasanoorutit ilaannit iluanaarutinit agguassisarnermut. Siunnersuut taamaammat pinngorpoq kissaatigineqarmat aningaasanoorutit ilaannit iluanaarutinit agguassisarnerup inatsisitigut tunngaviata erseqqissaavigineqarnissaa. Imarisamigulli annertunerusumik inatsisissatut siunnersuut Tipsernermit lottornermillu iluanaarutinit agguassisarneq pillugu Inatsisartut inatsisaannit maanna atuuttumik ingerlatitseqqinneruvoq.

Siunnersuut aammattaaq pinngorpoq aningaasanoorutit ilaannit iluanaarutinit pissarsianiit tapiiffigineqarsinnaasut, tapeeriaatsit, tapiinermi piumasaqaatit tapiinermilu atugassarititaasut pillugit killigitat erseqqissarnissaannik kissaateqarneq tunngavigalugu.

Naalakkersuisut tapiiffigineqarsinnaasut tapeeriaatsillu pillugit killigititanik erseqqissaasinnaanermik aalajangersaasinnaanermillu piginnaatinneqarnerisigut, Naalakkersuisut qinnuteqartunut atugassarititaasunik assigiissunik malittarisassiorsinnaanermut periarfissinneqarput. Taamaaliornikkut qinnuteqartut qinnuteqarnermi piumasaqaataasut qinnuteqartunut allanut aamma atuunnerat eqqanaarsinnaavaat aammalu eqqanaarsinnaavaat qinnuteqaatinik suliaqarnermi piumasaqaataasut assigiinnerat. Taamaalilluni qinnuteqartunut qinnuteqarnermi qinnuteqaatillu suliarineqarnerini piumasaqaataasunik inatsisitigullu atugassarititaasunik pitsanngorsaavigineqarput.

#### *2. Inatsisissatut siunnersuummi pingaarnertitat*

##### *a) Inatsisit atuuttut*

Aalajangersakkat atuuttut naapertorlugit tipsernermit lottornermillu isertitat § 2, imm 1, nr. 1-miit 3-mut taakkartorneqartuni suliniaqatigiiffinnut tamanullu iluaqutaasussatut agguanneqartarput. Taamaakkaluartoq tapiiffigineqarsinnaasunut, tapeeriaatsinut, tapiinermi piumasaqaataasunut imaluunniit atugassarititaasunut piumasaqaatitut maleruagassanik erseqqinnerusunik aalajangersaasoqarsimanngilaq. Taamaalilluni § 2, imm. 1, nr. 4 naapertorlugu taamaallaat tamanut iluaqutaasussanut tapiisinnaanermut qinnuteqartunut najoqqutassanik maleruagassiaqarpoq. Tamatuma kingunerisaanik qinnuteqaatit qinnuteqartunut aalajangersimasunik piumasaqaataasinnaasut naapertorlugit suliarineqarneq

ajorput. Qinnuteqartunut erseqqissunik piumasaqaateqartannginnerup, suliat suliarineqarnerini assigiinngisitaartunik suleriaaseqartarneq kingunerisinnaavaa.

*b) Siunnersuut*

Maleruagassat maanna atuuttut naapertorlugit Namminersorlutik Oqartussat Nunatsinni Danske Spil-ip pinnguaatinut sinneqartoorutaasunit ajunngitsuliornermut tamanullu iluaqutaasussanngorlugit agguaaassisarpoq. Aningaasanoorutininik ingerlataqarnerup ilaanik namminersortunngorsaaviginninnerup taassuma kingunerissavaa Danske Spil-ip sinneqartoorutaasa appariaateqarnissaat, tassa ingerlatseqatigiiffiup taassuma taamaallaat eqquniaasitsinernik aammalu hestit qimmillu sukkaniannerannik ataatsimoorluni eqqoriaasitsinernik siunissami neqerooruteqarsinnaalernissaata kiisalu ingerlatseqatigiiffiup soorlu Danmark-imi ingerlatsiviit (selskab-it) akileraarutaannik akiliisarnissaata kingunerisaannik.

Tamatuma Kalaallit Nunaannut aningaasatigut sunnuteqarnissaa pinngitsoorniarlugu Inatsisissatut siunnersuutikkut anguniarneqarpoq aningaasanik Kalaallit Nunaannut agguagassiisarnerup siunissami aningaasanoorutininik aalajangersimasunit isertitaasussanik avissaartinneqalernissaa, tassa maleruagassat atuuttut malillugit aningaasat kingullerpaamik tunniunneqartut annertoqqataannik aningaasanut inatsimmi immikkoortitsinikkut. Ukiumut naatsorsuuteqarfiusumut 2010-mut Kalaallit Nunaanni pinnguaatinut sinneqartoorutaasut 29,5 mio.kr. missaanniipput. L 223, 22. marts 2011-meersoq Aningaasanoorutit ilaat pillugit Kalaallit Nunaannut Inatsit aqqutigalugu taamaalilluni qularnaarneqassaaq aningaasat taakku 2010-mi ukiunilu tulluittuni tunniunneqartarnissaat. Danske Spil-ip Kalaallit Nunaanni aningaasanoorutitigut isertitaanit sinneqartoorutit ilanngarneqaratik danskit naalagaaffiata karsianut nakkartassapput.

Naalakkersuisut aningaasat tunniunneqartut § 2, imm. 1, nr. 1-miit 3-mut taaneqartut tunngavigalugit suliniaqatigiiffinnut kiisalu tamanut iluaqutaasussanngorlugit agguaaassisarpoq, tak. § 2, imm. 1, nr. 4.

Inatsimmi atuuttumi Naalakkersuisut qinnuteqaatinut piumasaqaatit, naatsorsuutininik tunniussinerit, tipsernermi lottornermilu iluanaarutininik pissarsiat agguanneqartarneri pillugit paasissutissiinerit aamma aalajangersakkat pillugit maalaarutit pillugit erseqqinnerusunik aalajangersaanissamut pisinnaatinneqareerput. Siunnersuut naapertorlugu Naalakkersuisut kikkut tapiissutisinnaanerannik killiliinerit, tapeeriaatsit, tapiinissamut piumasaqaatit aamma atugassarititaasut pillugit erseqqinnerusunik aalajangersagaliornissamut pisinnaatinneqassapput. Taamaalilluni qinnuteqartut qinnuteqaatimik suliarineqarnerini assigiiartumik sulissunneqarsinnaanissartik eqqanaassavaat.

*3. Pisortanut aningaasaqarnikkut allaffissornikkullu kingunerisassat*

Inatsisissatut siunnersuutip pisortanut allaffissornikkut aningaasaqarnikkulluunniit kinguneqartussaanaera naatsorsuutigineqanngilaq. Inatsit atuuttoq naapertorlugu Kultureqarnermut Naalakkersuisoqarfik § 1, imm. 1, nr. 4-mi taaneqartunut allaffissornikkut suliassanut ilaasunik suliassaqaareerpoq.

Folketingimit inatsisip akuersissutaasup L 223-ip, 22. marts 2011-meersup, Kalaallit Nunaanni aningaasanoorutit ilaat pillugit inatsisip aamma pisortanut allaffissornikkut

aningaasaqarnikkullu kinguneqarnissaa naatsorsuutigineqanngilaq, tassami tipsernermit lottornermillu pisakkat agguataarneqartarnerat pillugu (maannakkut aningaasanoorutit ilaannit iluanaarutinit pissarsiat) allannguutaasoq inatsimmi siuliani taaneqartumi § 35-imeereermat. Kalaallit Nunaanni aningaasanoorutit ilaat pillugit inatsimmi § 35 naapertorlugu danskit naalagaaffiata ukiumoortumik, Kalaallit Nunaanni pinnguaatitut ingerlanneqartut aningaasartai, Namminersorluni Oqartussanut nuuttartussaavai. Aningaasartai Danske Spil A/S-ip 2010-mi aningaasanut naatsorsuutaani anguneqartutut aalajangerneqartunut 2011-milu Namminersorlutik Oqartussanut nuunneqartussanut naapertuupput.

*4. Inuutissarsiuteqartunut aningaasaqarnikkut allaffissornikkullu kingunerisassat*  
Inatsisissatut siunnersuutip inuutissarsiuteqartunut allaffissornikkut imaluunniit aningaasaqarnikkut kinguneqarnissaa naatsorsuutigineqanngilaq.

*5. Avatangiisinut pinngortitamullu tunngatillugu kingunerisassat*  
Inatsisissatut siunnersuut avatangiisinut pinngortitamullu kinguneqassanngilaq.

*6. Innuttaasunut allaffissornikkut kingunerisassat*  
Inatsisissatut siunnersuut innuttaasunut annertunerusumik allaffissornikkut kinguneqarnissaa naatsorsuutigineqanngilaq. Maannamut piunnaasaqaataareerpoq innuttaasut qinnuteqaatinut ataasiakkaanut immersugassanik assigiinngitsunik atuisarnissaat. Inatsisissatut siunnersuutip innuttaasunut inatsisitigut atugassarititaasunik isumannaannerusunik kinguneqarnissaa naatsorsuutigineqarpoq tassami Naalakkersuisut qinnuteqartunut erseqqinnerusunik piunnaasaqaateqarnissaq pillugu aalajangersaasinnaanermut pisinnaatinneqassammata. Taamaalilluni inatsit naapertorlugu tapiissuteqarnissamut qinnuteqartut qinnuteqarnermi piunnaasaqaataasut pillugit atuagaqarsinnaanermtu periarfissinneqassapput. Naalakkersuisut pisinnaatitsissutinik naammassinninnerisigut qinnuteqartut, tapiissutit nalunaarusiornikkut aalajangersarneqarsimasutut agguanneqartarnissaat, eqqanaarsinnaavaat.

*7. Oqartussaasunik suliniaqatigiiffinnillu tusarniaaneq*  
Inatsisissatut siunnersuut piffissami 19. maj 2011-miit 27. juni 2011-mut ukunani tusarniaassutigineqarpoq:

Naalakkersuisuni Siulittaasup Naalakkersuisoqarfia

Aningaasaqarnermut Naalakkersuisoqarfik

Aalisarnermut, Piniarnermut Nunalerinermullu Naalakkersuisoqarfik

Inuutissarsiutinut Suliffeqarnermullu Naalakkersuisoqarfik

Ineqarnermut, Attaveqarnermut Angallanermullu Naalakkersuisoqarfik

Peqqissutsimut Naalakkersuisoqarfik

Ilinniartitaanermut Ilisimatusarnermullu Naalakkersuisoqarfik

Nunamut Namminermut, Pinngortitamut Avatangiisinullu Naalakkersuisoqarfik

Aatsitassanut Aqutsisoqarfik

KANUKOKA

Sorlak

Spejderit Kattuffiat

KIK

NAIP

Sanningasoq Tungujortoq (Blå Kors)

Kalaallit Nunaanni Timersoqatigiiffiit Kattuffiat

Elite Sport Greenland  
 Dida's Dansebureau  
 Nunatta Isiginnaartitsisarfia  
 Neriuffiit Kattuffiat  
 Katuaq  
 Taseralik  
 Mælkebøtten  
 Kattuffik Utoqqaat Nipaat  
 Nordisk Koncertkor  
 Kalaallit Atuakkiortut  
 Qeqqani Erinarsoqatigiit Kattuffiat  
 Kalaallit Røde Korsit  
 Peqatigiiffik Neriuseraq  
 Avannaani Erinarsoqatigiit Suleqatigiiffiat  
 Inatsisartut Ombudsmandiat

Tusarniaanerup naammassinerani tusarniaaffigineqartunit ukunannga akissutit tiguneqarput:

Kalaallit Atuakkiortut, Ilinniartitaanermut Ilisimatusarnermullu Naalackersuisoqarfik, Mælkebøtten, KANUKOKA, Inuutissarsiutinut Suliffeqarnermullu Naalackersuisoqarfik, Eqqumiitsuliornikkut Pinngorartitsisut Ingerlatsisullu (EPI), Sanningasoq Tungujortoq, kiisalu Inatsisartut Ombudsmandiat.

Kalaallit Atuakkiortut inatsisissatut missingersuummi aalajangersakkat assigiinngitsut ataatsimut isigalugit uparuagassaqanngillat. Kalaallit Atuakkiortut eqqumiitsuliortut peqatigiiffiisa kattuffiisalu kattuffiat EPI § 1, imm. 1-imut ilanngunneqarnissaa siunnersuutigissallugu kissaatigaa. Tamatumalu saniatigut Kalaallit Atuakkiortut eqqarsarnartoqartippaat Avalak immikkut taaneqarluni inatsimmiimmat isumaqarlutillu peqatigiiffiit suliniaqatigiiffiillu allat inatsimmi taaneqarnissaminut piumasaqalernerannik kinguneqarsinnaasoq.

*Naalackersuisut aalajangerpaat aningaasanik agguaassisarnermi sisamaasunut procentikkaarlugit agguaassisarnissamut aalajangerneqartut taamanikkut Naalackersuisuusimasunit 1. juli 1998-imili allaffissornikkut aalajangerneqarsimasut ingerlateqqissallugit.*

*Inatsisissatut siunnersuummi Avalak immikkut taaneqarnera peqatigiiffiup maani nunami najugaqarnissaanut piumasaqaatip eqqortinneqannginneranut atavoq. Naalackersuisut Tipsernermit lottornermillu iluanaarutinit agguaassisarneq pillugu Inatsisartut inatsisaanni nr. 7, 1. juni 2006-imeersumi malittarisassanit allaanermut aalajangersakkap ingerlateqqinneqarnissaa aalajangerpaat, taamaalilluni Avalak Danmarkimi najugaqaraluarluni aningaasanit aningaasanoorutit ilaannit agguaanneqartartunut qinnuteqarsinnaalersillugu. Tamatuma tunuliaqutaa Tipsernermit lottornermillu iluanaarutinit agguaassisarneq pillugu Inatsisartut inatsisaata nr. 7, 1. juni 2006-imeersup suliarineqarnerani nanineqassaaq, Inatsisartut taamanikkut pingaartillugu nalilerpaat, Avalak Dansk Ungdoms Fællesråd-imit (DUF) aningaasanik qinnuteqarnissamut periarfissaqannginnerat. Taamanikkut piviusumik Inatsisartut Kultureqarnermut Ilinniartitaanermullu Ataatsimiititaliap aalajangersagaq imatut*

*tunnngavilersorpaa: "Ataatsimiititaliap pingaarluinnartutut isigaa kalaallit ilinniagaqartut nunatsinni sorlaqartuusut kulturikkut suliaqarsinnaanissamut periarfissaqarnissaat".*

EPI-p uparuarpaa § 1-imi procentikkaarlugit agguaanerit equnganeri, tassami timersornermut eqqumiitsuliornermut suliaqartunut allanut naleqqiullugit pissarsinerusarmata. EPI-p siunnersuutigaa timersornermut agguanneqartartut 50 %-imiit 40-45 %-imut appartinneqassasut allannguullu tamanut iluaqutaasussanut allanut ilanngunneqassasoq. EPI tamanna tunuliaqutaralugu isumaqarpoq § 1, imm. 1, nr. 1, 2 aamma 4-mi procentikkaarlugit agguaassisarnerit allanngortinneqartariaqartut.

*Naalackersuisut aalajangerpaat aningaasanik agguaassisarnermi sisamaasunut procentikkaarlugit agguaassisarnissamut aalajangerneqartut taamanikkut Naalackersuisuusimasunit 1. juli 1998-imi allaffissornikkut aalajangerneqarsimasut ingerlateqqissallugit.*

Ilutigisaanik EPI-p uparuarpaa § 1, imm. 1, nr. 4-mi aningaasanik agguagarsinnaasut amerlavallaarnerarlugit. EPI ilanngullugu siunnersuuteqarpoq tapiissutisisartut ilaasa aningaasanit allanit ass. NUNA Fond, INUUNERITTA, PAARISA assigisaanillu qinnuteqarsinnaanerannik innersuussinissaq, taamaalilluni eqqumiitsuliornikkut ingerlatsisut malunnaatilimmik nukittorsarneqaqqullugit.

*Aningaasanoorutit ilaannit agguaassisarnermi inatsimmi tunnngavigineqartumi § 35-imi Aningaasanoorutit ilaat pillugit Kalaallit Nunaannut inatsimmi piumasarineqarpoq agguaassisarnerit tamanut iluaqutaasussanngorlugit agguanneqartassasut. Naalackersuisut § 1, imm. 1, nr. 4-mi kissaatigaat agguaassisarneq amerlanerpaanut iluaqutaanissaa. Tamatuma saniatigut eqqaaneqarsinnaavoq Naalackersuisut kommunalbestyrelsillu Kulturikkut ingerlatsineq sunngiffimmilu sammisassaqaqtitsineq pillugit peqqussummi § 30 tunnngavigalugu kulturikkut ingerlatsineq inunnillu qaammarsaaneq pillugit suliniutinut aammattaaq tapiisnaammata.*

Ombudsmandenip siunnersuutigaa "Inatsisartut Ombudsmandiat pillugu Inatsisartut inatsisaannut" innersuussineq inatsisissatut siunnersuummi § 7-imit peerneqassasoq. Tamatumunnga Ombudsmandip pissutigitiippaa, Ombudsmandi pillugu inatsimmi atuuttumi § 7, imm. 3, taanna malillugu Ombudsmandip nammineq aalajangersinnaammagu kattuffiit, peqatigiiffiit il.il. ingerlatsinikkut inatsisiliornikkut malittarisassanut ilaasut annertoqqataanik Ombudsmandip ingerlatsineranut ilaasussaammata.

*Naalackersuisut Ombudsmandip oqaaseqaatai tusaatissatut tiguaat.*

Ombudsmandip eqqaavaa inatsisissatut siunnersuummi § 7 inatsisissatut siunnersuummi § 6, imm. 1, nr. 1-miit 3-mut (maanna § 2, imm. 1, nr. 1-miit 3-usumut) sanilliullugu ingerlaannartumik ersarissumik isumasineqarsinnaanngimmat, kattuffiit tassani pineqartut aningaasat immikkoortitat ingerlateqqinnissaannut oqartussaasutut pisinnaatitaaffilerneqarmata, § 7-imiit kattuffiit pineqartut inatsisit tunuliaqutaralugit imaluunniit allaffissornikkut aalajangikkamik aalajangiinissaminut "qanoq annertutigisumik" pisussaaffilerneqarsimanerat pineqarluni.

Aammattaaq Ombudsmandip tikkuarpaa, pisinnaatitaaffik suna kattuffinnut namminersortunut tunniunneqarnerisooq erseqqissartariaqartoq. Ilutigisaanik Ombudsmandi

isumaqarpoq Naalackersuisut aammattaaq Toqqorsiveqarneq pillugu Inatsisartut inatsisaat kattuffinnut atuutissanersoq isummerfigisariaqaraat.

*Naalackersuisut malugeqqussavaat siunnersuummi § 7-imi pissutsit marluk pineqarmata. Siullermi pineqarpoq kattuffiit inatsisissatut siunnersuut manna naapertorlugu aalajangiinissamut pisinnaatitaaffilerneqarsimanerat, aappaannilu pineqarluni kattuffiit allanik pisinnaatitaaffilerneqarunnarneri, nalunaarut kingusinnerusukkut atuutilersinneqartoq tunngavigalugu. Naalackersuisut Ombudsmandip oqaaseqaatai tunuliaqataralugit inatsisissatut siunnersuummi § 7-imut oqaaseqaatit erseqqissarpaat. Toqqorsiveqarneq pillugu Inatsisartut inatsisaannut tunngatillugu, Naalackersuisut inatsit taanna tunngavigalugu aalajangersinnaavaat, inatsit kattuffinnut namminersortunut atuutissanersoq, tamanna pillugu kingusinnerusukkut nalunaarusiornermikkut.*

Tusarniaanermi akissuteqartunit siunnersuummut oqaaseqaateqaratik uku allapput:  
Ilinniartitaanermut Ilisimatusarnermullu Naalackersuisoqarfik, Mælkebøtten, KANUKOKA,  
Sanningasoq Tungujortoq aammalu Inuitissarsiutinut Suliffeqarnermullu  
Naalackersuisoqarfik.

Inatsisilerinermut Immikkoortortaqarfimmit aammalu Inatsisartut Inatsisissatut  
Nalilersuisarfianiit oqaaseqaatit siunnersuummi ilanngunneqareerput.

**Inatsisissatut siunnersuummi aalajangersakkanut ataasiakkaanut oqaaseqaatit**

## § 1-imut

Imm. 1-imut.

Aalajangersagaq Kalaallit Nunaanni aningaasanoorutit ilaat pillugit inatsimmi § 35-imik, Folketinge-mit 22. marts 2011-mi akuerineqartumik atortuulersitsineruvoq.

Aalajangersagaq § 1-imik maanna inatsimmi atuuttumit ingerlatitseqqiineruvoq. Tamatumalu saniatigut siunnersuummut oqaaseqaatinik nassuiaataasunik ilaneqarluni.

Aalajangersakkami, Kalaallit Nunaanni aningaasanoorutit ilaat pillugit inatsimmi piumasqaataasunut naapertuuttumik, aalajangiunneqarpoq aningaasanoorutit ilaannit iluanaarutit tamanut iluaqutaasussamik taamaallaat agguaanneqarsinnaasut, tassalu timersornermut, meeqqanut inuusuttunullu siunertanut, kiisalu nalinginnarmik iluaqutissanut allanut siunertaqartunut, taakkununnga ilanngullugit kulturimut tunngasunut, inunnik qaammarsaanermut, nappaatinik akiuiniarnermut pinaveersaartitsinernullu, inooqatigiinnermut tunngasunik siunertaqartunut, asimiititsinissanut siunertaqartunut aamma tamanut iluaqutaasussamik ilisimatusarnermut siunertaqartunut. Aalajangersagaq aalajangersakkanut atuuttunut naapertuuppoq. Tamanut iluaqutaasussatut siunertarineqartoq qinnuteqartut, peqataasut innuttaasullu nalinginnaasumik siamasissumik iluaqusissavai.

Aningaasanik agguaassisarnermi sisamaasunut procentikkaarlugit agguaassisarnissamut aalajangerneqartut taamanikkut Naalakkersuisuusimasunit 1. juli 1998-imili allaffissornikkut aalajangerneqarsimasunut naapertuupput. Siunertanut nalunaakkanut procentikkaarlugu agguataarinissamik siunnersuutigisaq Tipsernermit lottornermillu iluanaarutinit agguaassisarneq pillugu Inatsisartut inatsisaat nr. 13, 11. november 2000-imeersumit ingerlateqqinneqarpoq. Siunertaavoq aningaasanoorutit ilaannit tamanut iluaqutaasussatut suliniutinut aningaasanik agguaassisarnermi agguaasseriaatsit politikikkut akuerineqartunit ersarissumik aalajangiisoqarnissaa aammalu qularnaassallugu aningaasat taakkununnga atorineqarnissaat.

Imm. 2-mut.

Aalajangersagaq Tipsernermit lottornermillu iluanaarutinit agguaassisarneq pillugu Inatsisartut inatsisaata allanngortinneqarneranik Inatsisartut inatsisaat nr. 4, 21. maaji 2004-mit ingerlateqqinneqarpoq. Aalajangersagaq najoqqutaralugu aningaasat Kalaallit Nunaanni tipsernermit lottornermillu naalagaaffimmut akileraarutip 2004-mi atorunnaarsinneqartup annertoqatai siunertanut imm. 1-imi taaneqartunit allaanerusunut atorineqarsinnaapput.

Kalaallit Nunaanni tipsernermit lottornermillu iluanaarutininik kaaviiartitsinermit qallunaat naalagaaffiannut akitsuutininik 2004 aallarnerfigalugu akiliisoqartarunnaarsitsisumik pinnguaatit, eqqorniaasitsinerit eqquiniunnerillu ilaat pillugit qallunaat inatsisaata 26. marts 2003-mi allangortinneqarnera malittarisassamut tunngaviuvoq. Naalagaaffimmut akitsuut piffissami taamanikkut ukiumut 8 mio. kr. missaanniipput, taamanikkullu naalagaaffimmut 16 %-imik akitsuuserneqartarlutik. Akerlianik naalagaaffimmit ataatsimoortumik nunatsinnut tapiissutit aningaasat annertoqqataannik ikilisinneqarput. Aningaasanik Kalaallit Nunaanni tipsernermit lottornermillu naalagaaffimmut akileraarutip 2004-mi atorunnaarsinneqartup annertoqqataannik siunertanut imm. 1-imi taaneqartunit allaanerusunut atorneqarsinnaanerinit nunatta karsiata amigartooruteqanginnissaa isumannaarniarlugu imm. 2-mi periarfissiisoqarpoq.

Inatsimmi 2000-imeersumi aallaqqaammut periarfissaqaralarpoq tipsernermit lottornermillu aningaasat allaffissornikkut aningaasartuutit atorneqarsinnaaneri. Aalajangersagarli taanna ass. Tipsernermit iluanaarutit pillugit maleruagassiisartussatut suleqatigiissitaliamut allaffissornikkut aningaasartuutit pineqarnerat isiginiarneqassaaq. Tamannali inatsimmi 2006-imeersumi allangortinneqarpoq allaffissornikkut aningaasartuutit “tamanut iluaqutaasussatut siunertatut” isigineqarsinnaannginnera peqqutigalugu, taamaalillunilu taakku tipsernermit lottornermillu aningaasanit ilaatinneqartussaanaatik.

Imm. 3-mut.

Aalajangersagaq Tipsernermit lottornermillu iluanaarutinit agguassisarneq pillugu Inatsisartut inatsisaat nr. 13, 11. november 2000-imeersumi aalajangersakkanik ingerlatitseqqiineruvoq. Aningaasanoorutit ilaannit iluanaarutinit agguassinermi ukiumoortumik aningaasaateqarfimmut akiliisoqartarnissaanut taarsiullugu nunami maani allatigulluunniit illulioriaatsikkut nutaaliortumik kultureqarnikkut aammalu timersornermut tunngasunik sanaartornermut aningaasaateqarfiup aningaasatigut tapiisinnaanerani Najukkanut Sanaartugassanullu Aningaasaateqarfimmit Naalakkersuisut manna tikillugu pisarnermisut ilaatigut isumaqatiginninniarsinnaanerani aalajangersagaq nassataqarpoq. Tamatuma saniatigut tamanut iluaqutaasussanik isumaginnittunik isumaqatiginninniartarfinnik allanik assingusunik isumaqatiginninniarfigisaqarnissamut aalajangersagaq periarfissamik ammaavoq.

## § 2-mut

Imm. 1-imut.

Siunnersuutip § 2-a inatsimmi maanna atuuttumi § 2-mut naapertuuppoq.

Nr. 1-miit 3-mut suliniaqatigiiffiit aningaasanoorutit ilaannit iluanaarutininik agguassinermi Naalakkersuisunit misissugarineqarlutillu nakkutigineqartuupput, tak. §§ 4 aamma 5, sammisanillu inatsimmut matumunnga ilaasunut suliaqarnermimi ilaatigut suliassat suliarineqartarnerat pillugu inatsimmi aalajangersakkat najoqqutarissallugit, tak. siunnersuummi § 7.

Nr. 1-imi aamma 3-mi suliniaqatigiiffiit eqqartorneqartut aningaasanoorutit ilaannit iluanaarutininik agguasseqqinnermut atatillugu peqatigiiffinit il.il., suliniaqatigiiffinni ilaasortaangitsunit suliassat (qinnuteqaatit) aamma suliarisassavaat. Taamaattumik



agguaassinermik malittarisassat isumaqatigiissutiginerini il.il. inunnit, peqatigiiffinnit il.il. suliniaqatigiiffinni ilaasortaannngitsunit qinnuteqaatinik takkuttoqarsinnaanera pisariaqartumik sianigineqartassapput.

Imm. 2-mut.

Imm. 2 najoqqutaralugu imm. 1, nr. 1-miit 3-mut atugassanngortitanik ingerlatitseqqiinermik allaffissornerup Naalakkersuisut tigusinnaavaat suliniaqatigiiffiup tamanna pillugu Naalakkersuisut qinnuteqarfigippagit, imaluunniit suliniaqatigiiffiit suliassamik isumaginnissinnaajunnaarneranik pingaarutilimmik aalajangersimasumillu tunngavilersukkamik ilimaginnittoqarpat.

Aalajangersakkatut siunnersuutigineqartoq aningaasanoorutit ilaannit iluanaarutit ataavartumik allaffissornerup tungaatigut ingerlattuarnissaannik isumannaariniarnermik siunertaqarpoq. Assersuutigalugu suliniaqatigiiffimmi allannguuteqarnerup nassatarisaanik Kalaallit Nunaanni Timersoqatigiit Kattuffiata, Elite Sport Greenland-ip imaluunniit Sorlaap aningaasanoorutit ilaannit iluanaarutininik agguaassisarnermik suliaqarunnaarfiini aalajangersagaq ilaatigut atuutsinneqarsinnaavoq.

Suliniaqatigiiffiit suliassamik isumaginnissinnaajunnaarneranik pingaarutilimmik aalajangersimasumillu tunngavilersukkamik ilimaginnittoqarneranik pissutsinut Naalakkersuisut aningaasanoorutit ilaannit iluanaarutininik agguaassinermik allaffissornermik tigusaqarfiinut tamakkiisumik allattuiffimmik inissitsiterisoqarsinnaanngilaq. Assersuutigalugu naatsorsuuserinermi imaluunniit allaffissornermi pissutsini qitiusutut piunasaqaatinik malittarinninnissamik suliniaqatigiiffimmut Naalakkersuisut arlaleriarlutik qisuariarfineqannngitsumik saaffiginnittarsimaneranni, nutaanillu saaffiginnissutit pissutsinik pitsannorsaanissaannik kinguneqartitaqarnermik naatsorsuutigisaqarfiunngitsuni aalajangersagaq atorneqarsinnaavoq. Aammattaq suliniaqatigiiffiup aningaasanoorutit ilaannit iluanaarutininik agguaassinermik suliaanut sunniuteqarsinnaasunik sulianiaqatigiiffik ilumini isumaqatigiinngissutsinik pingaaruteqarlutillu sivisuumik ingerlatsiviisigut aalajangersagaq atorneqarsinnaavoq. Aammalu suliniaqatigiiffiup atuukkunnaavissimaneranik pissutsit najoqqutaralugit isigineqarsinnaanera aalajangersakkamut ilanngunneqarsinnaavoq.

### § 3-mut

Imm. 1-imut.

Aalajangersakkami Tipsernermit lottornermillu iluanaarutinit agguaassisarneq pillugu Inatsisartut inatsisaat nr. 7, 1. juni 2006-imeersumi aalajangersakkanik ingerlatitseqqiineruvoq, taamaalilluni tapiiffigitinnissamik qinnuteqartut Kalaallit Nunaanni najugaqartussaassallutik. Siunnersuut taamaalilluni inatsimmi maanna atuuttumi § 4-mut naapertuuppoq. Tamatumalu saniatigut siunnersuutip imm. 2-anut tapertatut oqaaseqaatinik ilanngussisoqarluni. Inatsisilerinermi angerlarsimaffeqarnissamik piunasaqaat peqatigiiffinnut, suliniaqatigiiffinnut, suliffeqarfinnut, pisortaqarfinnut assigisaannullu tunngasuuvoq, inuilli pinnguaatit ilaannit iluanaarutinit tapiissutigineqartartunik pissarsisinnaassagunik nunami maani najugaqartariaqarput.

Imm. 2-mut.

Aalajangersakkami erseqqissarneqarpoq Elite Sport Greenland inunnut Kalaallit Nunaata avataani najugaqartunut tapiissuteqarsinnaasoq, pissarsisussat Naalackersuisunit timersortartutut pikkorinnertut piukkunnaatilittulluunniit akuersissutigineqarsimappata. Timersornermut immikkut piginnaanillit timersortartullu pikkorinnerpaat Elite Sport Greenland-imit aammalu timersuutitut kattuffinnit innersuussutaareerlutik Ilinniartitaanermut Naalackersuisoqarfimmit timersornermut immikkut piginnaanillit timersortartutullu pikkorinnerpaatut akuerineqartarput. Kalaallit Nunaanni Timersoqatigiit Kattuffiata timersuutit namminneq timersuutiminnut kattuffeqanngitsut sinniisuuffigisinnaavai. Siunnersuut ilinniagaqarnersiuteqarnermut maleruagassanut kiisalu siunnersuutip § 3, imm. 3-anut atatillugu isiginiarneqassaaq. Aalajangersakkami, aningaasanoorutit ilaannit iluanaarutininik Kalaallit Nunaata pissarisaanik taamaallaat nunami maani inuit, peqatigiiffiit il.il. pissarsisinnaanerit isumannaarniarneqarpoq. Taamaalilluni nunami maani aallaaveqarlutik sammisaritinneqartut tapersorsorneqassapput.

Imm. 3-mut.

Aalajangersakkami Avalak, Danmarkimi kalaallit ilinniagaqartut peqatigiiffiat, tapiiffigineqarsinnaanermik pigisaqalerpoq, naak Danmarkimi angerlarsimaffeqaraluarluni. Tamatumani tunngavigineqarpoq, ilinniartut Danmarkimi najugaqarallartutut nalilerneqarnerat, taamaattumillu Kalaallit Nunaannut atassuteqartuaannartutut isigineqarlutik.

#### § 4-mut

Imm. 1-imut.

Aalajangersakkami ingerlateqqinneqarput Tipsernermit lottornermillu iluanaarutinit agguaassisarneq pillugu Inatsisartut inatsisaanni nr. 7, 1. juni 2006-imeersumi aalajangersakkat, Naalackersuisullu aningaasanoorutit ilaannit iluanaarutininik agguaassisarnerit Kalaallit Nunaanni Timersoqatigiit Kattuffiannit, Elite Sport Greenland-imit aamma Sorlammit ingerlanneqartartut nakkutiginnissaannut misissugarinissaannullu periarfissaannik eqqanaarinnittussaalluni. Siunnersuut inatsimmi maanna atuuttumi § 5-imut naapertuuppoq.

Imm. 1-imi aalajangersarneqarpoq, § 2, imm. 1, nr. 1- miit 3-mut suliniaqatigiiffiit taaneqartut kingusinnerpaamik 1. junimi Naalackersuisunut ukiumut siulianut naatsorsuiffimmut naatsorsuutiminnik kukkunersiorneqarsimasunik naatsorsuutinullu atukkanik allanik nassitsisarnissaat. Ukiumi ilivitsumi siuliani atugassanngortinneqartunut naatsorsuutit, kukkunersuisuutit pisortanit akuerisaasumit imaluunniit kukkunersuisartutut nalunaarutigineqarsimasumit, kukkunersiorneqareernerinik atsiornerinillu ilaqartitat ilanngunneqartussaapput.

Naatsorsuutitut atukkanut allanut pineqartunut isumagineqarput naatsorsuuserinermit allattaaviit, naatsorsuutitut allakkiat, ukiumoortumik nalunaarusiat il.il.. Akerlianik naatsorsuutitut ilanngussat aalajangersakkamut ilaatinneqanngillat. Naatsorsuutit naatsorsuutinullu atukkat allat kingusinnerpaamik 1. junimi nassiunneqassapput, taakku suliniaqatigiiffiit piginnaatillugit oqartussaasuinit akuersissutigineqarsimagaluarpataluunniit.

Imm. 2-mut.

Aalajangersakkami ingerlateqqinneqarput Tipsernermit lottornermillu iluanaarutinit agguaassisarneq pillugu Inatsisartut inatsisaanni nr. 7, 1. juni 2006-imeersumi aalajangersakkat tamatumani Naalakkersuisut periarfissinneqarput suliniaqatigiiffinnut siunissami akiliutinik kinguartitsinnaanermut, imm. 1-imi taaneqartutut naatsorsuutit nalunaarutaasullu piffissaq eqqorlugu takkutinngippata imaluunniit § 1, imm. 1-imi siunertanut taaneqartunut atugassanngortitat siunertanut atorneqarsimanninnerinik Naalakkersuisut paasisaqarpata. Akiliutinik kinguartitsineq taamaatinneqassaaq naatsorsuutit tamatumani kingunerisaanik nassiunneqarpata imaluunniit siunertanut naapertuuttumik atorneqarnerannik uppernarsaatissarsisoqarpat.

Aningaasanoorutit ilaannit iluanaarutit ingerlatsiviunerinik misissuinissamik nakkutilliinissamillu Naalakkersuisut periarfissaqarneranni naatsorsuutit, naatsorsuutitut atukkat allat nalunaarsuutillu pingaaruteqartuupput, taamaattumillu taakku piffissaq eqqorlugu takkuttarnissaat pingaartinneqarpoq. Atugassanngortitat § 1, imm. 1-imi nalunaarneqartutut siunertanut atorneqanngippata malittarisassanik unioqqutitsisoqassaaq, taamaattumillu Naalakkersuisut akuleruttussaapput siunissamilu akiliutigisassanik kinguartitaqarsinnaallutik. Aalajangersimasumik naliliisoqareernerup kingornatigut malittarisassanik erseqqissumik pingaarutilimmillu unioqqutitsisoqarnera taamatut akuliuttoqarneranut tunngaviussaaq. Pisuni erseqqissumik pisoqarfiunngitsuni pingaaruteqartutullu nalilerneranngitsuni taarsiullugu Naalakkersuisut suliniaqatigiiffiit siunissami suleriaatsiminnik allanngortitsinissaannik peqqussuteqarfigisinnaavaat. Pissutsit iluarsineqarnerisigut, tassalu naatsorsuutit il.il. Naalakkersuisunut nassiunneqarnerisigut, imaluunniit siunissami suliniaqatigiiffiit § 1, imm. 1-imi siunertanut nalunaarsorneqartunut atugassanngortitanik atuinerinik uppernarsaatinik pissarsinermi akiliutit kinguartinneri taamaatinneqassapput.

Akiliutit kinguartinnerinut atatillugu atugassanngortitanik agguasseqqinnermik isumaginninnermik Naalakkersuisut tigumminnikkallarnissaminnik aalajangiisnaapput, taamaalillutik aningaasanoorutit ilaannit iluanaarutinit tapiissutisartut kinguartitsinnermit eqqorneqassanngimmata.

#### § 5-imut

Aalajangersakkami ingerlateqqinneqarput Tipsernermit lottornermillu iluanaarutinit agguaassisarneq pillugu Inatsisartut inatsisaanni nr. 7, 1. juni 2006-imeersumi aalajangersakkat Naalakkersuisullu aningaasanoorutit ilaannit iluanaarutinit agguassinermik atuinermillu misissuinissaannik nakkutilliinissaannillu eqqanaarinnilluni. Siunnersuut inatsimmi maanna atuuttumi § 6-imut naapertuuppoq. Taamaalillutik tapiissutisartut, Kalaallit Nunaanni Timersoqatigiit Kattuffiat, Elite Sport Greenland aamma Sorlak qinnuteqarfigineqarnermikkut paasisutissanik tamanik Naalakkersuisunut nassitsisassapput, taakkununga ilanngullugit qinnuteqaatit pillugit paasisutissat, aalajangiussinerit, agguassinermut najoqqutassat, ilaasortat amerlassusiat, akiliutit il.il. Naalakkersuisunit piumaneqarsinnaapput suliani aalajangersimasuni ataasiakkaani, suliani arlalinni imaluunniit suliani tamani suliniaqatigiiffinnit eqqartorneqartunit suliarineqartuni paasisutissat.

Aalajangersagaq suliniaqatigiiffinnik taaneqartunik pingasunik misissuinissamut nakkutiginninnissamullu atugassanik pingaaruteqartunik tamanik Naalakkersuisut

noqqaassuteqarsinnaanerannik periarfissiivoq. Assigisaanittaaq aningaasanoorutit ilaannit iluanaarutinit tapiissutisisut, tapiissutit suliniaqatigiiffimmit imaluunniit Naalakkersuisunit agguanneqaralarpata, misissuinissamut nakkutiginninnissamullu atugassanik pingaaruteqartunik tamanik Naalakkersuisut noqqaassuteqarsinnaapput.

#### § 6-imut

Siunnersuut inatsimmi maanna atuuttumi § 7-ianik ingerlatitseqqiineruvoq. Aalajangersakkami aalajangerneqarpoq tapiissutit akuerineqarsimasut tamakkiisumik imaluunniit ilaannakortumik uterteqquneqarsinnaanerisa qaqugukkut pisinnaanerat, tamannalu Naalakkersuisunit, Kalaallit Nunaanni Timersoqatigiit Kattuffiannit, Elite Sport Greenland-imit aamma Sorlammit piumasarineqarsinnaavoq.

Qinnuteqaatip suliarinerani atugassatut paasissutissanik eqqunngitsunik qinnuteqartoq nalunaaruteqarsimappat, tapiissuteqarnermut piumasaqaatit ataaseq arlallilluunniit eqquutsinneqanngippata, imaluunniit ingerlataq tapiiffigineqartoq sinneqartooruteqarfiusimappat akuerisaallutik tapiissutit tamakkiisumik imaluunniit ilaannakortumik uterteqquneqarsinnaapput.

#### § 7-imut

Aalajangersakkami ingerlateqqinneqarput Tipsernermit lottornermillu iluanaarutinit agguaassisarneq pillugu Inatsisartut inatsisaanni nr. 7, 1. juni 2006-imeersumi aalajangersakkat, tamatumalu kingunerisaanik suliassat, Inatsisartut inatsisaannut matumunnga ilaasut imaluunniit malittarisassat taanna naapertorlugu akuersissutigineqartut najoqqutaralugit, suliniaqatigiiffinnit siunnersuummi § 2, imm. 1, nr. 1-miit 3-mut taaneqartutut isumagineqartut pisortat ingerlatsivianni suliassat suliarineqartarnerat pillugit inatsisinit aalajangiunneqartut sinaakkutaasa iluini pisartussaapput. Siunnersuut inatsimmi maanna atuuttumi § 3-anut naapertuuppoq, aalajangersagarli siunnersuutigineqarpoq kapitali 4-mut *suliassat suliarineqartarnerat aamma maalaarsinnaaneq* nuunneqassasoq taamaalilluni aalajangersakkat allaffissornermut tunngasut kapitalimi ataatsimi ataatsimoortinneqassammata.

Maluginiarneqassaaq, kattuffiit siunnersuummi aalajangersagaq naapertorlugu pisussaaffilerneqassammata, kattuffiit qinnuteqaatinik annguttunik suliaqarnerminni aalajangiisinnaanngorlugit. Taamaalillutik kattuffiit namminersortut qinnuteqaatit takkuttut suliarinerini suliamut peqataasinnaannginneq aamma nipangiussisussaataaneq pillugit malittarisassat maleruartaasavaat. Taamaalilluni inatsisitigut ingerlatsinermik piumasaqaatit tunngaviusut il.il. aningaasanoorutit ilaannit iluanaarutininik agguaassisarneq pillugu suliassat tamarmik suliarinerini aallaavigineqartarnissaat isumannaarneqassaaq, naak suliniaqatigiiffinnit namminersortunit Kalaallit Nunaanni Timersoqatigiit Kattuffiannit, Elite Sport Greenland-imit aamma Sorlammit suliassat isumagineqartaraluartut.

Aammattaaq maluginiarneqassaaq, kingusinnerusukkut nalunaarutaajunnartoq tunngavigalugu kattuffiit allanik pisinnaatitaaffilerneqarunik, aammattaaq suliassat suliarineqartarnerat pillugu inatsisip sinaakkusiussaasa iluanni sulianik suliarinnittassammata.

Naalakkersuisut tamanna pillugu nalunaarusiornerminni erseqqisassavaat, pisinnaatitaaffik tunniunneqartoq qanoq annertutigisumik aalajangiilluni suliaqarnertut isigineqassanersoq.

Maluginiarneqassaaq inatsimmi atuuttumi Inatsisartut Ombudsmandiat pillugu inatsimmut innersuussineq siunnersuummi ingerlateqqinneqanngimmat. Tamatumunnga pissutaavoq Inatsisartut Ombudsmandiat pillugu Inatsisartut Inatsisaat nr. 8, 3. december 2009-meersoq, tassani § 7, imm. 3-mi aalajangersarneqarmat Ombudsmandip nammineq aalajangissagaa, peqatigiiffiit, kattuffiit il.il. suliat suliarineqartarnerat pillugu inatsimmut inatsiliornikkut ilanngunneqartut, Ombudsmandip suliaasaanut ilaatinneqassanersut.

### § 8-mut

Imm. 1-imut.

Aalajangersagaq malittarisassanut maanna atuuttunut naleqqiullugu nutaajuvoq. Suliassaqarfimmi qinnuteqaatit inatsisit malillugit suliarineqartarnerat atuuttuvoq, tamannalu pisarpoq qinnuteqartunut aalajangersimasunik piumasaqaatitaqanngitsumik. Imaappoq tapiissutit, taamaallaat qinnuteqaatinut § 1, imm. 1, nr. 1-miit 4-mut siunertatut taaneqartunut atorneqarsinnaapput.

Allannguutissatut siunnersuutigineqartup qinnuteqartut inatsisitigut pisinnaatitaaffii pitsanngoriartissavai taamatut aalajangersaanermi Naalakkersuisut pisinnaatinneqassammata kikkut qinnuteqarsinnaanerinit, tapeeriaatsinut, tapiinissamut piumasaqaataasunut pisinnaatitaaffinnullu erseqqinnerusutigut killiliisinnaalissammata. Tamatumunnga ilanngullugit Naalakkersuisut oqariaatsit "*tamanut iluaqutaasussanut siunertanut*", "*timersornermut tamanit peqataaffigineqarsinnaasunut*", "*piukkunnaatillit pikkorinnerillu timersornerinit*", "*meeqqanut inuusuttunullu peqatigiiffiit*" il.il. erseqqinnerusunngorlugit paasinarsarneqarnissaannut periarfissinneqassapput.

Allannguutissatut siunnersuutikkut, pisinnaatitsissut Naalakkersuisunit atorneqassappat, qinnuteqartut erseqqissunik qinnuteqarnissaminut tunngavissinneqassapput tamatumani lu eqqanaarneqarsinnaavoq qinnuteqaatinik suliaqarnermi assigiiartumik pitsaassuseqartumillu periaaseqarsinnaanissaq.

Imm. 2-mut.

Aalajangersakkami aalajangiunneqarpoq Naalakkersuisut qinnuteqaatini piumasaqaataasussat pillugit erseqqinnerusunik malittarisassaliorsinnaasut. Imm. 2-mi piumasaqaataasutut nalunaarneqartut tamakkiisuunngillat taamaallaalli Naalakkersuisut sutigut malittarisassaliorsinnaanerannut assersuutaallutik.

Imm. 3-mut.

Aalajangersakkami aalajangersakkat atuuttut ingerlateqqinneqarput. § 2, imm. 1, nr. 1-miit 3-mut suliniaqatigiiffiit taaneqartut avaqqullugit allat aningaasanoorutit ilaannit iluanaarutinit tapiissutisimanerminni naatsorsuutunik nassiussisarnissaannik Naalakkersuisut erseqqinnerusunik malittarisassaliorsinnaapput.

Aalajangersagaq ilaatigut tapiissutisiat annertussusaat naapertorlugu naatsorsuutunik kukkunersiorinissamik piumasaqaatinik, aammalu tapiissutisut kukkunersuinermik

piumasaqaatinik aalajangersimasunik malittarisassaqaareernersut apeqqutaatillugu aalajangersaanissamut periarfissiivoq. Assersuutigalugu inunnut ataasiakkaanut tamanut iluaqutaasussatut siunertaqartunut immikkoortitanit ikinnerusunik tapiissutisisunut piumasaqaatit oqinnerusut inissitsiterfiginissaat eqqarsaatigineqarsinnaapput, aammalu kattuffinnut immikkut ittunut, Kalaallit Nunaanni Timersoqatigiit Kattuffiannut ilaasortaasunut annertunerusunik piumasaqaateqartoqarsinnaalluni. Aalajangersagaq aamma tapiissutisiat annertussusaat naapertorlugu naatsorsuutinik kukkunersiornissamik piumasaqaatinik, aammalu tapiissutisisut kukkunersiuinermik piumasaqaatinik aalajangersimasunik malittarisassaqaareernissaat pillugu aalajangersaanissamut periarfissiivoq.

Imm. 4-mut.

Aalajangersagaq aalajangersakkani maannamut atuuttuni § 8, imm. 3-mi pisinnaatitsissummik annertusaaneruvoq, tassani Naalakkersuisut tipsernermit lottornermillu iluanaarutininik agguaassisarneq pillugu atugassanngortitanik atuinermik paasissutissiinissaq pillugu erseqqinnerusunik malittarisassanik aalajangersaasinnaapput.

Siunnersuut naapertorlugu Naalakkersuisut, ilaatigut aningaasanoorutit ilaannit iluanaarutinit allaffissornermut paasissutissiinermullu aningaasartuutitut aningaasat amerlassusaannik atugaqarsinnaanermit killissarisanik aalajangiisunik malittarisassanik, aalajangersaasinnaaneritut pisinnaatinneqarput. Taamaalilluni Naalakkersuisut tamanna tunngavigalugu, tapiissutaasunut aalajangersimasunut tapiiffigineqartussanut tapiissutit annertussusissaannik aalajangersimasunik procentikkaarisinnaalissapput, tassani pineqarput § 2, imm. 1, nr. 1-miit 3-mut tunngavigalugu tapiissutisisartut.

Imm. 4-mi, allaffissornermut paasissutissiinermullu atugassat pillugit pisinnaatitsissut tamakkiisuunngilaq taamaallaalli assersuutaannaalluni. Taamaattumik Naalakkersuisut atuinissaq, tapiiffigineqarsinnaatitaasut il.il. pillugit allaasunik aalajangersagaliorsinnaapput.

Imm. 5-imut.

Aalajangersakkami Naalakkersuisut, § 2, imm. 1, nr. 1-miit 3-mut suliniaqatigiiffinnit taaneqartunit agguaasseqqinnermi aalajangiinerit pillugit maalaarutit, suliarineqarsinnaaneri pillugit aalajangersagaliornissamut pisinnaatinneqarput. Aalajangersakkami qinnuteqartut, § 2, imm. 1, nr. 1-miit 3-mut suliniaqatigiiffinnit taaneqartunit aalajangiiffigineqarsimasunik maalaaruteqarnissamut periarfissinneqarput, taamaaliornermilu eqqanaarniarneqarput suliat suliarineqarnerini periutsit assigiiarnerusut aamma suliat suliarineqarnerminni pitsaassuseqarnerusumik suliaasut.

#### § 9-mut

Siunnersuutigineqarpoq Inatsisartut inatsisaat 1. januar 2012-imi atuutilissasoq tamannalu ilutigalugu Tipsernermit lottornermillu iluanaarutinit agguaassisarneq pillugu Inatsisartut inatsisaat nr. 7, 1. juni 2006-imeersoq atorunnaarsinneqassasoq.

